

Inersimasunik ilinniartitsinerit pillugit Namminersorlutik Oqartussat nalunaarutaat nr. 9, 9. maj 2016-imeersoq

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi, Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaatigut nr. 3, 4. juni 2012-meersutigut allangortinneqartumi § 4, imm. 2, § 6, imm. 1, § 7, imm. 5, § 11, imm. 1 aamma § 60 naapertorlugit aalajangersarneqarpoq:

Inersimasunik ilinniartitsineq

§ 1. Inuussutissarsiutitigut tunngaviusumik ilinniartitsinerni, qitiusumik ilinniartitaanermi ataatsimiititaliap, Ilinniartitaanermut Naalakkersuisoqarfimmit akuersissutigineqareernermini aalajangersinnaavaa, inunnut immikkut ilinniagaqarnissamik suliffeqalernissamilluunniit naatsorsuutigineqartunut inersimasunik ilinniartitsinernik pilersitsisoqassasoq.

Ilinniartussanik tigusineq

§ 2. Qinnuteqartoq 30-nik ukioqalereersimassaaq attuumassuteqartumillu inuussutissarsiornermik misilittagaqassalluni amerlaqatigalugit ikinnerpaamik ukiuni pingasuni ulloq naallugu sulisarsimasutut imaluunniit allanut inuussutissarsiornermik misilittagaqassalluni amerlaqatigalugit ikinnerpaamik ukiuni sisamani ulloq naallugu sulisuusarsimaneq. Inersimasunik ilinniartitsinermik aallartitsisinnaajumalluni qinnuteqartoq pineqartumi ingerlatseqatigiiffimmik akuerisaasumik ilinniartuunissamat isumaqatigiissuteqarsimassaaq.

Imm. 2. Tiguneqarnissami naatsorsuutigineqarpoq aamma ilinniartutut isumaqatigiissuteqarnermi, qinnuteqartoq ilinniarfiup naliliinera naapertorlugu ilinniarfimmi ilinniarnerninik ingerlatsisinnaasutut piffissami ilinniarfiusussatut aalajangiussap iluani, immaqa ilinniartitsinermi immikkoortut ilaannik peersisoqareernerani.

Imm. 3. Qitiusumik ilinniartitaanermi ataatsimiititaliaq imaluunniit inuussutissarsiutinut ilinniarfiup siulersuisui pisuni immikkut ittuni annikinnerusunik ukioqarnissamat aamma suliffeqarsimanissamat piunasaqaammit imm. 1-imiittumit immikkut akuersissuteqarsinnaapput.

§ 3. Qinnuteqartunik tiguisarneq inuussutissarsiornermik imaluunniit inuussutissarsiutinut ilinniarfimmit ilinniarnissamik neqerooruteqartumit ingerlanneqartassaaq.

§ 4. Qitiusumik ilinniartitaanermi ataatsimiititaliap pineqartumi ilinniakkatigut sammisaqarfiusumi imaluunniit inuussutissarsiutinut ilinniarfiup siulersuisuisa inersimasunik ilinniartitsinerup aaqqissuussaana sivilissusialu aalajangersartarpaat, eqqarsaatigalugu ilinniartumit annikinnerpaatigut ilinniakkatigut killiffimmik inuusuttut lærlingip angusarisartagaatut killiffeqalerluni taamalu aamma soraarummeernissamik/svendeprøveqarnissamik angusinissamut naatsorsuutigineqartunik.

Imm. 2. Inuussutissarsiutinik imaluunniit inuussutissarsiutinut ilinniarfiup, ilinniartup aamma mesterip suleqatigiillutik inuttut immikkut ilinniagaqarnissamik ingerlatsinissaq aalajangersarsinnaavaat, taannalu pineqartup qitiusumik ilinniartitaanermi ataatsimiititaliaanut imaluunniit inuussutissarsiutinut ilinniarfiup siulersuisuinut akuersissutigisassanngorlugu saqqummiunneqassaaq.

Imm. 3. Inuttut immikkut ilinniagaqarnissamik ingerlatsinermi naliliinermi annertunerpaamik siusinnerusukkut ilinniagaqarsimanerit suliffeqarsimanerillu eqqarsaatigineqassapput, imaasilluguli taamaallaat ilinniartitsineq suliffeqarnerlu, ilinniartup maannakkut ilinniarnerata ilaanut naapertuunnersut pillugit oqimaalutarneqaannaratik, kisiannili aamma ilinniagaqarnernut assingusunut immaq inuussutissarsiutinut ilinniarnernut aamma suliffeqarnernut avataanniittunut, piviusumik taamaasiornikkut sanilliunneqarsinnaasutut pigineqartunut.

§ 5. Inersimasunik ilinniartitsineq nalinginnaasumik ingerlatseqatigiiffimmi aallartinneqartarpoq, tamatumalu kingorna ilinniarfimmi ilinniagaqarnerup aamma praktikkerluni ilinniagaqarnerup akornanni paarlakaallugu ingerlanneqartarluni.

Ilinniartup aamma ingerlatseqatigiiffiit inatsiseqarnikkut pissusaat

§ 6. Praktikkerneq ilinniarfimiinnerlu inatsisartut inatsisaanni sulisoqarnermut akitsuummut ilaatinneqanngillat. Taamaattumik inuussutissarsiutinut ilinniartitsinerit pikkorissarnerillu inuussutissarsiutitigut ilinniartitaanermiittut pillugit inatsisartut inatsisaat inersimasutut ilinniartunut sunniuteqanngilaq.

Imm. 2. Inersimasunut ilinniartunut ilinniarfimiinnerup nalaani sulitilluni iluanaarutissaraluanik annaasaqarnerisutit tunniunneqartassapput, inuussutissarsiutinut ilinniartitsinermi pikkorissarnernut, ilinniarfiliarnermut ilinniarfimiillu aallarnermut, angalanermut aningaasartuutit kiisalu ilinniartunut, ilinniarnerup ingerlanneqarfigisaani illoqarfimmeersuunngitsunut praktikkerneq ilinniarfimiinnerullu nalaani najugaqarnermut malittarisassat naapertorlugit.

Imm. 3. Ilinniartut praktikkerneq nalaani ingerlatseqatigiiffimmit aningaasarsiaqassapput.

Atortuulersinnera

§ 7. Nalunaarut ulloq 1. juni 2016-imi atuutilerpoq.

Nivi Olsen

/

Mikael Kristensen